

# Ils 6 d'avust 1806

Fin dal «Sontg Imperi roman»

DA GUIU SOBIELA-CAANITZ

■ **Ils 6 d'avust 1806 a Vienna ha Francestg II (1768–1835) sutscrit sia renunzia a la dignitad ed als duairs d'imperatur roman, liberond tuts vasals da l'imperi da lur obligaziuns envers sia persuna. El ha dentant salvà il titel d'imperatur da l'Austria ch'el aveva creà e surpiglià 1804.** Il pitschen Cors Napoléon Bonaparte (1769–1821) aveva ruinà ils fundaments dal vegl imperi, transfurmond la carta politica dals pajais tudestgs e stgaffind sez 1804 in agen imperi. La Frantscha aveva annectà las parts principalas da quatter pitgas renanas da la Germania imperiala, numnadamain ils principadis ecclesiastics da Colonia, Magonza e Trier ed il Contadi palatin. La Baviera ed il Württemberg avevan surpiglià la dignitad roiala e declerà lur sortida da l'imperi roman. Uschia è svanì in element essenzial da la politica europeana dapi Otto il grond (912–973). Lez era vegnì encurunà imperatur 962 a Roma dal papa; Otto n'ha dentant betg fundà in'entitad giuridica nova, mabain acceptà l'ierta da Carl il grond († 814), restaurond ina dignitad che papa son Leo III († 816) aveva creà 800 encurunond il retg francon imperatur «roman» da l'Occident.

## Trais reginams

Il possess imperial d'Otto era pli pitschen che quel da Carl. Quest possedeva tuttas Gallias anticas, dano la penisla bretona independenta, e schizunt quai ch'ins numna oz la Catalu-

gna veglia, pia cun Barcelona, conquistada 801 dals Francons. Il reginam tudestg d'Otto perencunter tanscheva encunter sidvest mo enfin al Lucmagn, al Lai da las quatter forestas, Säckingen, las funtaunas da la Moselle e Saône, Verdun/Lorena, Gent/Flandra e las sbuccadas dal Rain en l'Olanda. Otto era plinavant retg da l'Italia, da las Alps enfin al Circeo/Lazio ed al flum Biferno/Molise. 1033 a Payerne VD è l'imperatur Curò († 1039) vegnì encurunà retg da Burgogna (a l'ost da la Sâone); ses successurs han mantegnì lezza usanza enfin a Carl IV (1316–1378), encurunà 1365 ad Arles/Provenza. Era ses figl Sigismund (1368–1437), imperatur davent da 1433, ha s'occupà da l'ierta burgognaisa, concedind 1416 il titel da duca a cont Amédée da Savoia (1383–1451), il futur papa Felici V. Mo prinzi da l'imperi è vegnìs imperaturs; quai na vul betg dir che tuts hajan savì tudestg. L'istoricher franzos Jean-François Noël ha deditgà in cudesch tastgabel fitg detaglià (1) a lezza entitad.

## Da Cipra a la Sicilia e l'Estonia

Ils successurs d'Otto han schlargià ils cunfins da Germania encunter nordost, en Brandenburg, Pomarania, Saxonia e Silesia. Ma l'imperi medieval na dominava be pajais tudestgs. Cuntunt Fadri «barba cotschna» (1122–1190) e ses biadi Fadri II (1194–1250), il Federico da Giovanni Netzer, mettevan grond pais sin lur pussanza taliana. Cun Fadri II possedeava l'impe-

ri il post exteriur da Sicilia; in segund era quel dals chevaliers tudestgs en la Prussia da l'ost, la Lettonia e l'Estonia. Perfin retg Amaury da Cipra († 1205) e cuntunt ses schender, retg Leo da l'Armenia «pitschna» († 1219), han sa renconuschids vasals da l'imperi da l'Occident. Il reginam armen ha sa mantegnì fin a 1375 en l'intschess muntagnard d'Adana che fa oz part da la Turchia dal sid, sper il Mar mediterranean. L'imperi da Fadri è vegnì adina pli conscient da sasez. Noël punctuescha: «L'adjectiv ‚sontg‘ (‚sacrum, heilig‘) è documentà davent da 1157 ed il num cumponì ‚Sontg Imperi roman‘ davent da 1254» (p. 33). Ma suenter Fadri II è l'autorità imperiala vegnida dal main. Pir 1312 ha il papa encurunà puppè in imperatur, numnadamain Henri VII († 1313). «Dante era persvas che Henri possia metter perina las partidas talianas e restaurar la concordia enturn al papa e l'imperatur. Ses siemi antiqua è vegnì trumpà svel; il papa ha pudì encurunar Henri mo ordaifer Roma, perquai che las partidas cumbattevan aifer la citad» (pp. 48–49). En il 16avel tschientaner han ins simplamain renunzià a lezza conferma papala. En in text uffizial da 1512 è cumparì in num nov da l'imperi: «Sontg Imperi roman da naziun tudestga» (Noël, p. 66).

## Decennis da guerras en Germania

La sort da l'imperi regardava pia cuntunt ils pajais tudestgs. Quai ha sa palesà a moda snuavla en il 16avel tschientaner ed en la prima mesadad

dal 17avel. A la dieta da Worms 1521 ha l'imperatur Carl V (1500–1558) cartà da liquidar il muntg «eretic» Martin Luther (1483–1546) cun la proscriziun, confermada 1530 da la dieta d'Augsburg. Ils prinzi protestants han lura s'alliads cun la Frantscha, e l'imperatur surventschì ha stuì legalisar 1555 la confessiun d'Augsburg, pia quella da Luther. Noël: «La norma renumada: ‚Cuius regio, eius religio‘ reglava la partiziun geografica da las concessiuns; ils subdits duevan surpigliar la religiun da lur signurs territorials (...). L'imperi aveva adina fatg da rempar per eccellenza da l'unitad cristiana; 1555 ha'l dentant, sco emprim stadi, stabilì la ruptura da lezza unitad» (pp. 94–95). Ma la pasch n'ha betg cuzzà. En la guerra da trenta onns (1618–1648) han cumbattì armadas da l'imperi, da prinzi tudestgs e da pajais esters. Noël: «En trenta onns ha la Germania pers 40 % da sia populaziun. S'enclergia che l'imperi è stà il grond perdent (...). La pasch da Vestfalia (...) ha cuntunt adossà unfrendas territorialas a l'imperi. Insaquantas han confermà situaziuns anteriuras, sco l'indipendenza da Svizra ed Olanda e la cessiun da Metz, Toul e Verdun a la Frantscha. Ma questa ha obtegnì era ils possess alsazians da Habsburg (...). La confessiun reformada è vegnida la terza legala [en Germania] sper la catolica e luterana» (pp. 99–100).

## Vers il pluralissem religius

La libertad religiusa valeva be per ils prinzi, ma la pasch francava ina sort

pluralissem confessiunal e tschentava ils stadis sur la religiun, realisond ina premissa da la secularisaziun che nus enconuschain: «Las trais confessiuns cristianas savevan viver ina sper l'autra en l'imperi (...). En l'investgieu d'Osnabrück alternavan in investg catolic ed in evangelic sco suverans (...). Plaun a plaun (...) ha sa fatga valair ina toleranza da princip, en connex cun in'indifferenza creschenta areguard la religiun (...). 1673 hai savì succeder ch'il prinzi palatin Carl Ludovic (...) ha clamà il gidieu Spinoza, il qual valeva sco ateiist, per instruir a l'Universitad da Heidelberg. In professer da teologia a lezza universitad ha intermedià l'invit a Spinoza, al garantind ch'il prinzi al dettia tutta libertad da filosofar» (2). La pasch da Vestfalia ha pia pussibilità il svilup da l'illuminessem en Germania, en il spiert dals «trais anels» da Giovanni Boccaccio (1313–1375), evocà da maister da Gotthold Ephraim Lessing (1729–1781) en ses drama «Nathan der Weise». Quai duainsa oz far endament, en fatscha a l'offensiva fundamentalista che vul manar enavos noss mund en il temp da la constricziun spiertala.

1) Jean-François Noël, *Le Saint-Empire. «Que sais-je?»*, tom 1646. Paris (puf) 1976.

2) Ricarda Huch, *Deutsche Geschichte. Tom 2: Das Zeitalter der Glaubensspaltung. Minca e Hamburg (Siebenstern-Taschenbuch, tom 19/20) 1964, pp. 383–384.*